



**ATASSUT**  
**Steen Lyngé**

**UKA 2016/33**  
**11. 10. 2016**

**Meeqqat atuarfianni ilinniusiat (atuartitsissutit) qaffasissusaanik Naalakkersuisut misissueqqullugit peqquneqarnissaanik Inatsisartut aalajangiiffigisassaattut siunnersuut. Misissuinnermit inerniliusaaq UKA2017-imi saqqummiunneqassaaq.**  
(Inatsisartunut ilaasortaq Suka K. Frederiksen, Siumut)

Atassummit siunnersuuteqartoq Suka K. Frederiksen, Siumut soqutigintumik siunnersuuteqarneranut qutsavigissavarput.

Pingaaruteqarpoq atuartinneqartup ineriartornera pissappat aammalu soqutiginninnera attatiinnassagaanni, atuartitsissutit inuiaqatigiinni pissutsinut takussutissiisuullutillu attuumassuteqartuunissaat.

Atuartitsissutit assigiinngisitaartuunissaat aammalu pitsaassuseqarnissaat pingaaruteqarpoq ilinniartitsinermi anguniakkanik naammassinnissutaasinnaassappata, minnerunngitsumillu aamma atuaqatigiinnut atuartinneqartussat pisinnaasaannut naleqqussagaasimassallutik.

Aammattaaq atuartitsissutit ima ilusilersugaasimassapput, atuartitsisup periaatsit assigiinngitsut ilinniartitsinermi anguniakkatut aalajangiunneqarsimasut atorlugit naammassinnissinnaanissaa.

Atuartitsissutit assigiinngitsumik ilusilersorneqartussaapput, atuartitsineq atuaqatigiit pisariaqartitsinerat naapertorlugu ilusilersorneqarsinnaaqullugu, taamatullu aamma ilinniartitsisup atuartitseriaasisanut tulluartuussalluni.

Taamaattumik pingaaruteqarpoq atuartitsissutit ineriartortinneqartuarnissaat ineriartornermut malinnaatinneqarluni.

Kalaallit Nunaanni Ilinniusiorfik meeqqat atuarfiinut atuartitsissutinik ineriartortitsisuuvoq aammalu ukiorpassuit ingerlanerini ilisimasat piginnaasallu atuartitsissutit ineriartortinnerinut annertuut ineritissimallugit, Kalaallit Nunaanni pissutsinut naleqqussakkat.

Naak Atassummit siunnersuuteqartup kissaataa paasisinnaagaluarlutigu, atuartitsissutit naliginnaasumik nalilersuiffigineqarsinnaanissaat, taamaattoq Atassummit isumaqarpugut taamatut misissuineq imminni atuartitsissutit pitsanngoriartitsinissaannik qaffaataasinnaangitsoq. Tamanna peqquteqarpoq atuaqatigiinnut aalajangersimasunut atuartitsissutit alajangersimasumik uuttuuteqarluni uuttortarneqarsinnaanngimmata, tassami assigiinngisitaartussatut ineritinneqarnikummata.

Aamma Naalackersuisut akissuteqaataanni takuneqarsinnaavoq ullumikkut atuartitsissutit 2000 missaanniittut, ukiut 30-ni sulisitsilluni nalilersorneqartariallit. Taamatullu aningaasaqarnitta sukagatiginerani, pissusissamisuussanngilaq taamatut aningaasaatit meeqqat atuarfianni atuartitsissutit naliginnaasumik nalilersuiffigineqarnissaannut atussallugit.

Atassummi naalackersuinikkut siunnerfigaarput, meeqqat atuarfiata qaffasissumik pitsaassuseqarnissaat, tamannalu angusaqassappat taava isumaqarpugut, meeqqat atuarfiata pitsaanerpaanik sinaakkutissaqartinnissaa. Tamanna anguneqassappat, taava meeqqat atuarfiinut atatillugu ataavartumik aningaasaliiffigineqartariaqarpoq atuartitsissusiornermik ineriartortitsisartut minnerunngitsumillu ilinniartitsisut pikkorissartinneqartarnissaannut - taakkummatami marluk imminut attuumassuteqarluinnartut.

Atuartitsissusiortut atuartitsisullu ineriartornermut malinnaajuarneratigut anguneqassaaq meeqqat atuarfiini atuartitsineq qaffasissup neqeroorutigineqarsinnaalernissaa.

Taama oqaaseqarluta siunnersuut tapersinngilarput.